

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Broj: 02-02-374/11  
Sarajevo, 27.04.2011. godine

**Z A P I S N I K**  
**2. VANREDNE SJEDNICE DOMA NARODA PARLAMENTA FEDERACIJE  
BOSNE I HERCEGOVINE, održane 27. aprila 2011. godine**

Sjednica je počela u 15.16.

Sjednici je predsjedavala Karolina Pavlović, predsjedavajuća Doma naroda Parlamenta Federacije BiH.

Predsjedavajuća je pozdravila delegate, potpredsjednike Federacije BiH Mirsada Kebu i Svetozara Pudarića, zamjenika premijera Desnicu Radivojevića, ministre u Vladi Federacije BiH, predstavnike akreditiranih medijskih kuća koji prate rad sjednice.

Na osnovu evidencije Stručne službe, predsjedavajuća je konstatovala da sjednici prisustvuju 32 delegata, što čini većinu, te Dom naroda može raditi i punovažno odlučivati.

Predsjedavajuća je obavijestila delegate da je Kolegij Doma naroda odlučio da sazove sjednicu na kojoj bi se donijela deklaracija o bitnim pitanjima od interesa za Federaciju BiH. Također, Kolegij Doma naroda predložio je da se kao 3. tačka dnevnog reda sjednice uvrsti - Izbor Administrativne komisije Doma naroda - kako bi Dom naroda mogao normalno funkcionirati.

Budući da nije bilo novih prijedloga za izmjenu i dopunu predloženog dnevnog reda predsjedavajuća ga je dala na glasanje i konstatovala da je Dom naroda Parlamenta Federacije jednoglasno (32 glasa) usvojio sljedeći:

## DNEVNI RED

1. Verifikovanje mandata delegatima u Domu naroda Parlamenta Federacije BiH,
2. Deklaracija o opredjeljenosti za evro-atlantske integracije i vladavinu prava,
3. Izbor Administrativne komisije Doma naroda.

### **1. Verifikovanje mandata delegatima u Domu naroda Parlamenta Federacije BiH**

Na osnovu Odluke o utvrđivanju rezultata posrednih izbora i dodjeli mandata Centralna izborna komisija Bosne i Hercegovine dodijelila je mandate za Dom naroda Parlamenta Federacije BiH sljedećim delegatima:

- Husi Obradoviću iz reda ostalih iz Hercegovačko-neretvanskog kantona;
- Enesu Salkanoviću iz reda bošnjačkog naroda iz Posavskog kantona;
- Mukadesi Anadolac iz reda bošnjačkog naroda iz Zapadnohercegovačkog kantona;
- Slobodanu Tomiću iz reda srpskog naroda iz Zapadnohercegovačkog kantona;
- Josipu Periću iz reda hrvatskog naroda iz Kantona 10;
- Jasenku Tufekčiću iz reda bošnjačkog naroda iz Kantona 10;
- Dragi Puzigaći iz reda srpskog naroda iz Kantona 10.

Sladjan Ilić, predsjednik privremene Mandatno-imunitetske komisije, obrazložio je Izvještaj Komisije kojim se predlaže da Dom naroda verifikuje mandat sljedećim delegatima: Husi Obradoviću, Enesu Salkanoviću, Mukadesi Anadolac, Slobodanu Tomiću, Josipu Periću, Jasenku Tufekčiću i Dragi Puzigaći.

U raspravi nije niko učestvovao.

Na osnovu rezultata glasanja, predsjedavajuća je konstatovala da je Dom naroda Parlamenta Federacije jednoglasno (32 glasa) usvojio Izvještaj Komisije kojim je Dom naroda verifikovao mandat sljedećim delegatima: Husi Obradoviću, Enesu Salkanoviću, Mukadesi Anadolac, Slobodanu Tomiću, Josipu Periću, Jasenku Tufekčiću i Dragi Puzigaći.

Potom su delegati položili svečanu zakletvu.

## 2. Deklaracija o opredjeljenosti za evro-atlantske integracije i vladavinu prava

Predstavnički dom je na 4. vanrednoj sjednici, održanoj 27.04.2011. godine, donio Deklaraciju o opredjeljenosti za evro-atlantske integracije, vladavinu prava, jednakopravnost konstitutivnih naroda i ostalih i dosljednu provedbu Dejtonskog mirovnog sporazuma i dostavio je Domu naroda.

U raspravi su učestvovali: Adnan Jupić, Mira Ljubjankić - predsjednica Kluba delegata srpskog naroda u Domu naroda, Ivo Divković - privremeni predsjednik Kluba delegata hrvatskog naroda u Domu naroda, Amir Zukić - predsjednik Kluba delegata bošnjačkog naroda u Domu naroda, Zoran Jovanović i Zijat Mušić.

Nakon toga predsjedavajuća je pročitala tekst Dekleracije i dala je na glasanje.

Na osnovu rezultata glasanja, predsjedavajuća je konstatovala da je Dom naroda Parlamenta Federacije jednoglasno (35 glasova) donio Deklaraciju o opredjeljenosti za evro-atlantske integracije, vladavinu prava, jednakopravnost konstitutivnih naroda i ostalih i dosljednu provedbu Dejtonskog mirovnog sporazuma.

Tekst Deklaracije glasi:

**Polazeći** od činjenice da je Aneksom IV Općeg okvirnog sporazuma (Dejtonski mirovni sporazum) Bosna i Hercegovina nastavila svoje pravno postojanje po međunarodnom pravu kao demokratska država sa dva entiteta i Brčko Distriktom Bosne i Hercegovine, a što je potvrđeno tekstom člana I.(1.) Ustava Bosne i Hercegovine: "Republika Bosna i Hercegovina, čije je zvanično ime od sada „Bosna i Hercegovina“, nastavlja svoje pravno postojanje po međunarodnom pravu kao država, sa unutrašnjom strukturom modificiranom ovim ustavom i sa postojećim međunarodno priznatim granicama. Ona ostaje država članica Ujedinjenih naroda i može kao Bosna i Hercegovina zadržati članstvo ili zatražiti prijem u organizacijama unutar sistema Ujedinjenih naroda, kao i drugim međunarodnim organizacijama."

**Poštujući** Ustav Bosne i Hercegovine i zakone donesene na državnom nivou, **Usmjereni** ka integriranju Bosne i Hercegovine u Evropsku uniju i NATO i ka izgradnji funkcionalnih i efikasnih državnih struktura, **Odlučno odbacujući** prijetnje teritorijalnom integritetu, suverenitetu, političkoj nezavisnosti i međunarodnom subjektivitetu Bosne i Hercegovine, **Ubijedeći** da jedino demokratski organi vlasti države Bosne i Hercegovine osiguravaju pravično ostvarivanje prava i interesa svih njenih građana i naroda,

**Uvjereni** da je primarni interes svih građana insistiranje na pravu zasnovanom na međunarodnim principima koji ukidaju diskriminacije i odgovaraju potrebama evroatlantskih integracija,

**Imajući** u vidu ustavnu poziciju Federacije BiH kao jednog od dva ravnopravna entiteta suverene države Bosne i Hercegovine,

**Opredijeljeni** da poduzmemo sve što je u nadležnosti Federacije BiH u cilju primjene principa ustavnosti i zakonitosti,

**Osuđujući** govor mržnje i zloupotrebu etničkih i vjerskih osjećanja građana Federacije BiH i Bosne i Hercegovine,

**Suočeni** sa dugogodišnjim podrivanjem državnih institucija i Dejtonskog mirovnog sporazuma,

**Svjesni** svih socijalnih i ekonomskih izazova sa kojima su suočeni svi građani Bosne i Hercegovine,

**Odlučni** u namjeri da osiguramo punu nacionalnu ravnopravnost, demokratske odnose i najviše standarde ljudskih prava i osnovnih sloboda na cijeloj teritoriji Bosne i Hercegovine,

**Posvećeni** miru, pravdi, povećanju privrednog razvoja i općeg prosperiteta za sve narode i građane Bosne i Hercegovine,

**Pozivajući** sve političke snage u Bosne i Hercegovine da pristupe konstruktivnom i brzom formiranju parlamentarne većine na nivou Bosne i Hercegovine,

Na osnovu člana 149. Poslovnika Predstavničkog doma Parlamenta Federacije BiH i člana 203. Poslovnika o radu Doma naroda Parlamenta Federacije BiH, Parlament Federacije BiH je na sjednici Predstavničkog doma, održanoj 27.04.2011. godine, i na sjednici Doma naroda, održanoj 27.04.2011. godine, donio

## D E K L A R A C I J U

### O OPREDIJELJENOSTI

### ZA EVRO-ATLANTSKE INTEGRACIJE, VLADAVINU PRAVA, RAVNOPRAVNOST KONSTITUTIVNIH NARODA I OSTALIH I DOSLJEDNO PROVOĐENJE DEJTONSKOG MIROVNOG SPORAZUMA

#### I. Evro-atlantske integracije

Odlučno podržavamo reforme koje će osigurati da Bosna i Hercegovina ispuni svoje obaveze u vezi sa nepovratnim kretanjem Bosne i Hercegovine prema evro-atlantskim integracijama.

Pozivamo na prioritarno uspostavljanje efikasnog mehanizma za utvrđivanje konkretnih prijedloga za provođenje ustavne reforme koja bi za cilj, osim rješavanja pitanja diskriminatorskih odredbi u čitavom ustavnopravnom sistemu Bosne i Hercegovine, trebala imati poboljšanje procesa odlučivanja kako bi Bosna i Hercegovina bila u poziciji da usvoji, provodi i primjenjuje korake koji su

potrebni za unutrašnju integraciju Bosne i Hercegovine kao i za unapređenje integracije naše zemlje u Evropsku uniju.

Tražimo od svih institucija u Bosni i Hercegovini da daju puni doprinos ubrzanoj izradi cjelovitog nacionalnog/državnog programa integriranja Bosne i Hercegovine u Evropsku uniju kako bi do kraja ove godine Bosna i Hercegovina ispunila uvjete za podnošenje zahtjeva i sticanje statusa kandidata za članstvo u Evropsku uniju.

Obavezujemo se na jačanje administrativnih i drugih kapaciteta u Bosni i Hercegovini potrebnih za efikasnu provedbu njenih obaveza iz Sporazuma o stabilizaciji i pridruživanju, doprinoseći da Bosna i Hercegovina dobije kandidatski status u naredne dvije godine kako bi 2014. godine otpočeo proces pregovaranja sa Evropskom unijom o punopravnom članstvu.

Pozivamo sve relevantne institucije da osiguraju nužne pretpostavke za početak praktične primjene Akcionog plana za članstvo (MAP), posebno za rješavanje pitanja vojne imovine i ispunjavanje uvjeta za punopravno članstvo Bosne i Hercegovine u NATO tokom ovog mandatnog perioda.

Podržavamo odluku da se razdvoje funkcije OHR-a i EUSR-a i pozivamo da se što prije imenuje specijalni predstavnik Evropske unije i osnaži njegova funkcija kako bi se u saradnji sa domaćim institucijama ubrao evropski put Bosne i Hercegovine.

Podržavamo odluku Evropske unije da sankcioniše sve koji opstrukcijama i blokadama provođenja Dejtonskog mirovnog sporazuma usporavaju put ka članstvu Bosne i Hercegovine u Evropsku uniju i NATO.

## **II. Vladavina prava**

Podržavamo neometano funkcioniranje nezavisnog i nepristrasnog pravosudnog sistema koji svim građanima treba osigurati jednak tretman i pravo na pristup bez diskriminacije po bilo kojem osnovu.

Odlučno odbacujemo entitetsko osporavanje državnog suda i tužilaštva, jer državne institucije uspostavljene na osnovu Ustava i zakona Bosne i Hercegovine, kao neizostavni dio nezavisnog i nepristrasnog pravosudnog sistema Bosne i Hercegovine, ne može osporavati nijedan entitet.

Osuđujemo napade i na sve druge institucije Bosne i Hercegovine koje provode vladavinu prava, posebno na OSA-u i SIPA-u i podržavamo njihov rad na zaštiti ustavnopravnog poretka i u borbi protiv organiziranog kriminala, korupcije, terorizma i ratnih zločina.

Iskazujemo stav o potvrđivanju kontinuiteta Bosne i Hercegovine koja je titular prava i na državnoj imovini.

Smatramo, radi izjednačavanja sudske prakse i osiguranja jedinstvene primjene zaštite ljudskih prava i sloboda na prostoru cijele države, neophodnom uspostavu Vrhovnog suda Bosne i Hercegovine.

### **III. Ravnopravnost konstitutivnih naroda, ostalih i građana**

Podržavamo reforme Ustava i pratećeg zakonodavstva koje će osigurati pravnu, demokratsku, socijalnu, sekularnu i ekonomski prosperitetnu državu te mehanizme institucionalne ravnopravnosti konstitutivnih naroda i ostalih na cijeloj teritoriji Bosne i Hercegovine na svim nivoima (općine, kantoni, entiteti, država) u zakonodavnoj, izvršnoj i sudskoj vlasti.

Insistiramo na osiguranju pune ravnopravnosti konstitutivnih naroda, ostalih i građana kao i na efikasnom ostvarivanju i zaštiti najviših međunarodnih standarda individualnih prava i sloboda na cijelom prostoru Bosne i Hercegovine.

Zalagat ćemo se za izmjenu Ustava Bosne i Hercegovine koja će osigurati funkcionalniju i efikasniju organizaciju države i teritorijalnu organizaciju shodno evropskim standardima na osnovu geografskih, historijskih, privrednih, etničkih, prometnih i drugih kriterija.

Pozivamo na otklanjanje diskriminacije u ustavnopravnom sistemu Bosne i Hercegovine provodeći Odluku u slučaju Sejdić-Finci kao i na usklađivanje cjelokupnog pravnog sistema Bosne i Hercegovine sa Evropskom konvencijom o ljudskim pravima i sa svim dodatnim sporazumima o ljudskim pravima koji su navedeni u Ustavu Bosne i Hercegovine.

### **IV. Provođenje Općeg okvirnog sporazuma za Bosnu i Hercegovinu (Dejtonski mirovni sporazum)**

Protivimo se selektivnom provođenju Dejtonskog mirovnog sporazuma koje je usmjereno na pravnu destrukciju i neprimjenjivanje obavezujućih pravnih normi Sporazuma, posebno Aneksa IV (Ustav Bosne i Hercegovine), Aneksa VI (Ljudska prava), Aneksa VII (Povratak izbjeglica i raseljenih osoba) i Aneksa IX (Državne korporacije).

Odbacujemo osporavanje državnih zakona i institucija od entiteta, jer je to uzurpiranje nepripadajućih nadležnosti.

Odbacujemo entitetsko osporavanje odluka OHR-a kao grubi atak na Dejtonski mirovni sporazum i pravni sistem države i isto smatramo osporavanjem cjelokupne implementacije Dejtonskog mirovnog sporazuma.

Podržavamo snažnije prisustvo i ulogu specijalnog predstavnika Evropske unije, kao i nužnost trajanja institucionalne funkcije OHR-a sve do pune implementacije Dejtonskog mirovnog sporazuma i prijenosa njegovih nadležnosti na domaće institucije, odnosno do prijema Bosne i Hercegovine u NATO.

Pozivamo Visokog predstavnika u Bosni i Hercegovini da i dalje aktivno radi na provedbi preostalih odredaba Dejtonskog mirovnog sporazuma te da, u skladu sa svojim mandatom i obavezama, poništi sve odluke koje nisu u skladu sa Dejtonskim mirovnim sporazumom i čija bi provedba značila odustajanje od Dejtonskog mirovnog sporazuma te da sankcionira odgovorne.

### **3. Izbor Administrativne komisije Doma naroda**

Predsjedavajuća je podsjetila delegate da je ova tačka uvrštena u dnevni red kako bi se izabrala Administrativna komisija Doma naroda i Dom mogao normalno funkcionirati.

Potom je pozvala predsjednike klubova naroda da daju prijedloge članova ove komisije.

Mira Ljubijankić je, ispred Kluba delegata srpskog naroda, predložila Slađana Ilića i Predraga Kojovića.

Ivo Divković je, ispred Kluba delegata hrvatskog naroda, predložio Karolinu Pavlović i Josipa Perića.

Amir Zukić je, ispred Kluba delegata bošnjačkog naroda, predložio Jasmina Smailbegovića i Amira Zukića.

Esed Radeljaš je, ispred delegata iz reda ostalih, predložio Amela Hadžiabdića.

Nakon toga, predsjedavajuća je dala pauzu kako bi se Privremena komisija za izbor i imenovanja sastala i podnijela Izvještaj.

Nakon pause, Mirijana Malić obrazložila je Izvještaj Privremene komisije za izbor i imenovanja te predložila Domu naroda da za članove Administrativne komisije izabere: Amela Hadžiabdića, Slađana Ilića, Predraga Kojovića, Karolinu Pavlović, Josipa Perića, Jasmina Smailbegovića i Amira Zukića.

Na osnovu rezultata glasanja, predsjedavajuća je konstatovala da je Dom naroda Parlamenta Federacije, sa 29 glasova za i uz jedan uzdržani glas, izabrao Administrativnu komisiju u sljedećem sastavu: Amel Hadžiabdić,

Slađan Ilić, Predrag Kojović, Karolina Pavlović, Josip Perić, Jasmin Smailbegović i Amir Zukić.

Sjednica je završena u 16.18.

Transkript sjednice čini sastavni dio Zapisnika.

SEKRETAR

Izmir Hadžić

PREDSJEDAVAJUĆA

Karolina Pavlović